

Heiqcuengh:

Dujva Yisuz Minzczuz Ronghsag

灿烂的民族艺术之花——壮剧

□ Vangz Suifangh



▲ Heiqcuengh 《Roegenq Coengmingz Loengh Duzguk》 mizyinx raixcaix.

◀ Heiqcuengh ciuhneix 《Daihit Suhgi》 yienj daengz Baekging ndaej haenhndei.

Heiqcuengh dwg cungj citheiq daiqbiuj Bouxcuengh raeuz, youq Guengjsae baihsae、baihnamz、ranghyang caeuq Yinznanz Swngj Funingz、Gvangjnanz doenghdieng neix riuzhengz, daengz seizneix gaengq miz song bak lai bi lizsij. Heihcuengh gig miz daegsaek minzczuz, dwg cungj yisuz citheiq beixnuengx Bouxcuengh haengj dingq gyaez yawj ndeu. Bi 2006 ndwen 5, Heiqcuengh ginggvaq Gozvuyen baecinj ndaej lied hauej buek daih'it guekgya gaep feihvuzciz vwnzva yizcanj mingzloeg.

Heiqcuengq ciuq gij vahdeihfueng dieg riuzcienz de caeuq gij daegcwnq citheiq youq vahgangj gyoebbaenz de bae faen, miz baihaek、baihnamz caeuq heiqgoengsaesam loih Heiqcuengh. Sam cungj citheiq neix doenghdieng riuzcienz、dieggoemqew nem yienghbyaij hwnghat de mbouj doxdoengz, suibingz biujyienj caemh mbouj bingzyaenx; gij diuhciengq、funggek biujyienj、biucinj biujyienj de caemh mbouj doengz.

Heiqcuengh baihaek gaxgonq heuhguh "heiqdoj", youq Denzlinz、Lungzlinz、Sihlinz、Lingzyinz、Baksak、Lozyez daengj dieg riuzcienz haemq hoengh. Heuh de guh Heiqcuengh baihaek dwg aenvih youq ranghdieng vahdeihfueng baihaek Vahcuengh nem aeu vahdeihfueng yienjciengq, gij diuhciengq de daegbied gag miz, caemh miz mbangj ciuqei gij diuhciengq aen minzczuz wng "bienq Cuengh" le gyoebbaenz gij funggek bonjfaenh. Heiqmoeg miz 《Vwnzlungz Caeuq Sauniq》《Nungz Cigauh》daengj. Heiqcuengh baihnamz youh heuhguh "heiqyallah", youq ranghdieng Dwzbauj、Cingsih、Nazboh、Denhdwnj、Dasinh daengj riuzcienz, diuhciengq dwg youq gwnz goekdaej fwen dangdieg

giethab yaem'wenq gangjciengq "moedlaenz" hwnghat baenz. Heiqmoeg miz 《Dahrongnding》《Lwgyoux Bauj》《Nyenz Nding》daengj. Heiqgoengsaes Bouxcuengh youh heuhguh "ciengqsae" "heiqsei", youq ranghdieng Laizbinh、Yizcouh、Gveigangj、Vujmingz daengj riuzcienz, caemh heuhguh Heihcuengh ranghyang. Heiqgoengsaes Bouxcuengh "heiqdaengqgeg" hainduj ciengq gojsaeh haenx dwg gij diuhciengq cingciengq, daih'iek buenq faen cung ciengq hot fwen ndeu, gij daegdiemj de dwg daj gyaeu daengz rieng cungj dwg ciengq, mbouj miz gangjbeg, baez ciengq couh ciengq daengz daej, gij diuhciengq de dwg youz haujlai aen gizbaiz mbouj doxdoengz haenx lienzrangh hwnjdauej gyoebbaenz. Heiqmoeg miz baenz 300 lai aen, lumj 《Samyenz》《Vuengz Byajraez》《Moz It Daihvuengz》《Daej Meh》《Buhbwnroeg》daengj.

Gij swzciengq、gangjbeg Heihcuengh aeu vahdeihfueng Bouxcuengh ciengq, gig miz daegdiemj minzczuz, gak cungj diuhciengq cungj dwg gij diuhciengq fwen beixnuengx Bouxcuengh raeuz cungj gig sugsed haenx, louz miz fwen Bouxcuengh gij yaemlwd dawzyinh gag miz haenx, youq gij citheiq Cungguk ndawde daegbied gag miz. Gij biujyienj



▲ Denzlinz Yen bibi banh ciet yisuz vwnzva Heiqcuengh baihaek.



▲ Yienzndokmax youq ndaw Heiqcuengh miz yungh lai.

Heiqcuengh baihaek, bouxseng、bouxdan cungj gaem fanbeiz, buzcouj gaem beizsen, sengnyaq、danva gaem beizcej. Heiqcuengh baihnamz biujyienj seiz bouxgiek caemh miz faengoeng, najva miz najva hung najva nyaq, sengnyaq miz sengfaenz sengfoux, giekdan miz dancingq、danfoux、danlaux. Heiqgoengsaes Bouxcuengh ne, geiz nduj miz caetcib ngeih cungj mauhngge, moix cungj daiqbiuj loih vunz ndeu, gak miz gij yienghndang denjhingz bonjfaenh. Gij buenxciengq Heiqcuengh, cujyau yozgi dwg yienzndokmax, lij boiq miz ngeihyienz doj、yienzlwgyoux caeuq ngeihyienz、samyienz、digdaengj roxnaeuz digvang, mbangjseiz lij miz boq mbawfaex buenxciengq dem, aen yozdui ndaekndek itbuen miz seiq boux vunz, yozgi miz gyongbenj、moegnayawz、gyongram、gyongrwi、gyongnyaq、cacemq、laz daengj.

Bi 2009, Denzlinz Yen ndaej aen mingzdaeuz ndei "mbanjranz Heiqcuengh Cungguk"; bi 2012, Dwzbauj Yen aeundaen mingzdaeuz ndei "mbanjranz yisuz yienzndokmax Bouxcuengh" caeuq "mbanjranz yisuz vwnzva ndawbiengz Cungguk", doenghgij mingzdaeuz ndei neix, hawj Heiqcuengh youq Mbanjcuengh riuzcienz ndaej engq hwnghoengh.



▲ Yienhciegz biujyienj Heiqcuengh baihaek.



▲ Hangzdangq Heiqcuengh—Dannyaq caeuq sengnyaq.



▲ Canghyienj biujyienj heiqgoengsaes Bouxcuengh.



▲ Ciengzmienh Fungz ciengginh daiq bing bae hoenxciengq ndaw Heiqcuengh lizsij《Fungz Swjcaiz》.